

武林掌故叢編

光緒丙申夏四月

照膽臺志略

錢唐楊振鏞書



八千卷樓付雕

光緒辛卯重修西湖照膽臺關廟成而鄒君典三爲之志志成問敘於余余謂關廟之名照膽臺不知始於何人亦不知何所取義殆謂神之威靈足以照人肝膽歟則姑從俗名之可以勿論惟廟藏帝印乾隆閒上塵

御覽

賜題三十四字恭鐫其上今此印雖移藏文瀾閣而推原其始實廟中物

高廟賜題有云碑永藏焉則藏於閣亦卽藏於廟也豈他廟所能及哉信乎爲西湖一名蹟矣余戊辰歲

初來湖上值蔣果敏公重建之後廟貌煥然未及十載又將撓傾余偶啜茗水閣佳持導至大殿則柱與礎離以扇入之納者踰寸余因言於方伯今陝督楊公而葺治之乃至今而又修焉三十年中余三見其新然則土木之工雖極堅固必不能久非有紀述奚以垂示將來鄒君之爲此志洵善矣哉杭州神廟如伍如岳固皆有志鄒君此志吾知其必與俱傳矣德

清俞樾

天下祠廟之廣且多者莫甚於關帝至以武廟之稱
媿於文廟其實文廟各郡縣一而已若武廟以杭城
計已數十處顧他廟不之及而獨志照膽臺者何居
豈以帝之印歷千百年失而復得者再爲神所憑依
歟抑以西湖關廟廣志版燬於兵火不可復得而拾
遺訂墜歟之二者意近是而非寅之所敢知也寅從
事濬湖有年局初設於照膽臺朝夕瞻仰而不能無
今昔之感者昔之日有司致祭仁和在于步廊錢塘
則春秋承祀于斯俎豆致嚴肅如也而今合祭于吳
山湖之濱寂然矣昔之日蘇常嘉湖之進香天竺者

必虔請帝之印以歸謂利蠶事今亦無過問矣以致
廟日頽廢住持幾不能自存雖局中歲加修葺然上
雨旁風積至辛卯冬棟折榱崩將有壓焉之懼丁君
丙許君郊請于方伯劉公撥欸興修方伯韙之命寅
董其役寅病其地勢窪下爲培之使高廟貌乃巍然
煥然頓改舊觀因念明時金公結吟社于此池蓮渚
柳風景已非斷碣殘碑不可無考爰就所見聞者彙
爲一編以自附不賢識小之義至帝之靈昭千古非
寅所能贊一辭并不繫志之有無也是爲序光緒二
十一年仲冬錢塘鄒在寅


照膽臺志略卷首

候選儒學訓導臣鄒在寅恭摹

康熙
御賜

懷 冰 雪

西湖聖因寺東漢
壽亭侯廟歲玉印
一乾隆辛未南巡
見其古色黝然用
識歲月俾永藏焉
御題



照膽臺志略

錢塘鄒在寅典三輯

建置

御覽西湖志纂

關帝廟在聖因寺東俗名照膽臺舊貯玉印一顆相傳爲神所佩

康熙錢塘縣志

孤山關帝廟俗名照膽臺前有三義閣後有清嘯閣向貯玉印一文曰漢壽亭侯印瓦紐相傳爲神故印有石刻竹相傳爲神舊筆以竹葉畫成詩字又有碑

刻白蘇詩及唐宋人孤山詩董其昌書

湖壖雜記

照膽臺卽竹閣有漢壽亭侯碧玉方印乃漁人得之
楚澤杭人宦楚者得之漁人而進於廟者順治時一
人以計賺去見帝示靈旋歸於廟夫帝加號帝矣何
有於侯不舍其印然印神物也赫赫帝君其印尙可
攫之而走人將無復知有神矣神特顯靈所以爲設
教之助也

雍正西湖志

關帝廟在孤山之陽俗名照膽臺前有三義閣後有

清嘯亭舊貯玉印一白質黑章中有一穴似便於佩帶而設穴中紋極細作紅色斑駁如錦一面刻漢壽亭侯印一面刻帝諱至今崇奉廟中

乾隆杭州府志

關帝廟一在孤山名照膽臺有三義閣

湖山便覽

照膽臺在聖因寺東隄祀關帝明萬厯時郡紳金學曾建其子季真嘗集友共結慈社於此前有三義閣後有清嘯亭亭後山坡卽宋志所謂瑪瑙坡也向貯玉印一兩面有文一曰漢壽亭侯一爲神諱相傳神

所故佩

關帝事蹟徵信編

照膽臺本延祥舊址前明萬厯四十五年錢塘金中丞學會因感神佑同仁錢二縣鄉宦凌登名姚文蔚等具呈軍門劉公請以孤山之陽書院之側官地創建帝祠准佃給帖下府行查隨據仁和錢塘二縣申覆杭州府遵照於書院東隙地五畝聽其捐金起建完日給帖入冊輸糧奉撫院劉公批准於時助成者方伯志寰陳公斗垣周公皆金中丞舊知而三義閣則嵯臺胡公所構也總計廟址二十二畝一分香火

田六畝載西湖關廟廣紀甚詳則知靈貺之臻實由誠感像成懸臆時事適符乃今去萬厯僅百數十年而創置始末已莫能知無怪說印者之紛紛矣

光緒杭州府志

照膽臺在孤山之陽唐永福寺宋延祥觀址明萬厯四十五年錢塘金學曾請官地創建以祀關帝前有
三義閣爲鹽臺胡公所建舊址二十二畝一分香火
田六畝載西湖關廟廣紀歲久廟失修基亦侵軼
國朝康熙年浙江巡撫陳秉直重修春秋秩祀於此
仁廟御賜懷冰雪匾額舊藏玉印一乾隆辛未

純廟南巡

御筆題其端嘉慶閒郡人何銑金重建粵匪之變印
失廟廢同治五年布政使蔣益澧重建并募帝辭曹
操與張益德書勒石廟壁杭州府知府薛時雨購印
滬上恭藏詒經精舍嗣又移庋

文瀾閣同治八年巡撫楊昌濬重修光緒十七年布
政使劉樹棠葺而新之

石刻

明關帝君殿募緣疏

特建關帝君殿募緣疏

文見藝文

萬曆四十五年九月華亭舊史董其昌書

書成輒有客以漢壽亭侯印至書與時會可異也像
設成著置胸中志帝君心在漢室之意可耳其昌又
題

明關帝殿碑

西湖建關帝廟碑記

文見藝文

天啟二年歲在壬戌孟冬廿有三日賜進士出身中
憲大夫太常寺少卿兼翰林院侍讀學士前管理起
居誥勅纂修正史經筵日講官董其昌撰 賜進士
出身中議大夫浙江布政司右參政分守金衢嚴道

前欽差提督輓廠兼理關座工部營繕清吏司郎中
米萬鍾書 賜進士出身通奉大夫浙江布政司左
布政使前山東按察司按察使欽差提督浙江等處
學校按察司副使戶部河南清吏司郎中周延光立
杭州府儒學增廣生金嘉會篆 住持僧眞禮
雲閒顧紹勳鏤

省吾金中丞將建關廟於西湖報閩中旗鼓之靈卜
址未定戊午歲中丞公病亟令嗣季眞虔禱於神病
良已遂倡緣孤山成焉光祿岳石帆公記所謂忠孝
併者也相國沈銘纘公太守凌梓崖公廉憲諸曾縣